



**Kamis, 13 Mei 2021**

*Ogen: Lukas 24 : 50-53*



Tangkat IA Ku Surga



**W**ari enda si peringeti wari kenangkihen Tuhan Yesus ku Surga. Kenca Yesus keke i bas si mate nari, lit 40 wari nari dekahna IA ringan i doni enda janah i je icidah-cidahkenNa diriNa man ajar-ajarNa. Tujunna gelah kerina ajar-ajar tek maka Yesus enggo keke i bas si mate. Kiniteken e mpeturah semangat ras komitmen tetap ngikutken Yesus, lanai aru ate entah mbiar man pemerintahen doni si enggo nangkap Yesus ras si makukensa ku kayu persilang. Kiniteken man Yesus e pe erbahansa ergiah-giah naksiken kekeken Yesus e man sekelewetna, alu tetap ersada arih ras sikeleng-kelengen sada ras sidebanna. Persadan ajar-ajar e jadi kesaksin man jelma si enterem kerna cara nggeluh anak-anak Tuhan. Bage me sura-sura Yesus nandangi ajar-ajarNa e kerina. Renungenta wari enda nuriken kerna perbahanen Yesus man ajar-ajarNa ope IA iangkat ku ku Surga. Ibaba Yesus ajar-ajarNa ku darat kuta, seh ku Betani. Kuta e pernah idahi Yesus ras ajar-ajarNa eme kuta sahabat-sahabatNa Marta, Maria ras Lasarus. Ije pernah ituduhkanNa kuasaNa eme mpekeke Lasarus i bas si mate nari. I bas daerah e ka me Yesus masu-masu ajar-ajarNa, janah asum IA masu-masu e sirang IA ras kalak e, iangkat IA ku Surga. Masu-masu ertina mereken kuasa, gegeh, kengasupen man ajar-ajar lako naksiken kerna Yesus man enterem jelma. Pasu-pasu e mpetetap ukur ajar-ajar lako ndalanken ras ndahiken persuruhan Yesus i doni enda. Pasu-pasu epe mereken keriahen ukur, semangat, ras ergiah-giah. Mulih kerina ajar-ajar ku Jerusalem alu meriah ukur. Gedang-gedang wari ipujina Dibata i rumah pertoton. Amin Yesus secara fisik lanai ras ajar-ajar i doni enda tapi tetap ukur ajar-ajar sebab pasu-pasu Tuhan Yesus e tetap ras ia kerina. Kearun ate salih jadi ketetapan ukur, kebiaren salih jadi keriahen, bagem adi pasu-pasu Tuhan e ringan i bas kita.